



**MATIFASI**

**UBUNTU  
MI DE FU DI WI DE**



**sankofa**

Wan wortu na fesi gi papa nanga mama

A wrokobuku disi meki gi pikin fu leri sabi den Afrikankondre rutu fruku-fruku. A de wan bun sani gi pikin fu sabi pe den afu fu den komoto te den yongu ete.

A kan yepi den fu tanapu kankan tapu grontapu. A wrokobuku disi na wan moi fondamenti fu bigin leri sabi yusrefi.

Nanga makandra unu kan leri nanga frustan den wondru fu Afrika én unu kan leri fa fu du sani tapu wan preiprei-fasi. Mi wani gi yu deki-ati fu ondrosuku den nen, kondre, sma nanga den tra sani di skrifi na ini a buku disi tu tapu tra fasi soleki, Internet, den felem tapu YouTube nanga difrenti buku. Kande unu kan feni fowtow tapu Internet fu meki yu pikin si nanga en eigi ai taki ala sani di skrifi tru, so taki a o frustan taki a kan go luku den presi wan dei.

A wrokobuku disi meki nanga lobi.... Mi winsi taki yu nanga yu pikin o lobi fu leisi a buku disi en taki unu sa leri furu.



### **Gye Nyame (God)**

Wan wortu na fesi

Leki pikin mi ben gro kon sondro fu sabi mi Afrikankondre rutu. A wan enkri sani di mi ben sabi ben de pindasupu, san mi ben nyan nanga mi anu. Di mi ben kon moro bigi mi ben syen srefisrefi taki mi na wan afrikansma. A firi disi mi ben kisi fu di mi ben luku én si nyunsu tapu telefisi di ben abi fu du nanga Afrikankondre.

Di mi ben tapu 19 yari wan sma leri mi fu den moi wondru nanga a historia fu Afrikankondre. Mi ben leri fu si Afrikankondre trafasi én mi ben fruwondru misrefi srefisrefi.

A fasi fa mi e si sani now e prisiri mi ati, mi libi nanga mi eigi warti kenki fu tego. Mi ben meki wan sweri. Mi ben pramisi taki solanga mi de na libi ete mi sa meki sma sabi fu den moimoi sani fu Afrikankondre en fu gi sma deki-atи fu go na a moi kondre disi én fu go bow drape. Mi e si en leki mi frantwortu fu meki heri grontapu sabi taki fa prensipari a de fu meki pikin sabi pe den komoto en pe den o go.

Lobi Laucyna Bodaan



## Anansi téte

Wan wortu na fesi gi ala pikin.

Mi breiti taki yu kisi a buku disi! Yu e wani sabi moro sani fu den wondru fu Afrika? Ai, mi wani en tu!

Mi ati breiti taki yu e leisi a buku disi nanga mi now, meki wi go luku sortu moi san wi sa feni fu Afrikankondre. Hori yusrefi bun, no fadon fu di a pasi langa.

A wrokobuku disi switi fu abi fu di ala sani di de na ini, yu kan moi den nanga kloru. Yu kan du disi nanga yu papa nanga mama so taki den kan yepi yu fu suku felem nanga fowtow tapu Internet fu den sani di yu e leri na ini a buku disi. Nanga makandra unu kan go ondrosuku sani fu Afrikankondre.

Mi denki taki yu sa fruwondru yusrefi fu ala sani di yu kan leri fu Afrikankondre. Mi e winsi yu furu prisiri nanga ala sani di yu sa leri, wi o si makandra tapu a tra bladzijde.

Waran lobi, Mama Afrika